

**Meeqqat atuarfiat pillugu Inatsisartut peqqussutissaattut siunnersuut**

**pillugu**

**Inatsisartut Kultureqarnermut Ilinniartitaanermullu Ataatsimiititaliaata**

**ISUMALIUTISSIISSUTAA**

**aappassaanneerinissamut saqqummiunneqartoq**

Inatsisartut Kultureqarnermut Ilinniartitaanermullu Ataatsimiititaliaat suliarinninnermini uku-ninnga inuttaqarpoq:

Inatsisartuni ilaasortaq Naimingitsoq Petersen, Atassut, siulittaasoq  
Inatsisartuni ilaasortaq Ruth Heilmann, Siumut, siulittaasup tullia (UKA01-mi siulittaasoq)  
Inatsisartuni ilaasortaq Lars Karl Jensen, Siumut  
Inatsisartuni ilaasortaq Olga Poulsen, Inuit Ataqatigiit (Paninnguaq Olsen, UKA01-mi sinniisussaq)  
Inatsisartuni ilaasortaq Mogens Kleist, Kattusseqatigiit

Inatsisartut Kultureqarnermut Ilinniartitaanermullu Ataatsimiititaliaata UKA2001-imi siullermeerqarnerata kingorna Meeqqat atuarfiat pillugu Inatsisartut peqqussutissaattut siunnersuut misissuataarpaa imaattunillu oqaaseqarfigissallugu:

Siunnersuutip ataatsimiititaliamit suliarineqarneranut atatillugu ataatsimiititaliaq UKA01-imi ukiullu ingerlanerani arlaleriaqaluni ataatsimiittarpoq. Ilanngullugu ataatsimiititaliamit IMAK aamma KANUKOKA UKA01-ip nalaani kiisalu 2002-mi upernaakkut ataatsimeeqatigiumallugit aggersartarsimavai aamma Naalakkersuisunut ilaasortaq "Atuarfitsialak" pillugu pingasoriarlugu isumasioqatigalugu ataatsimeeqatigineqartarpoq: UKA01-imi kiisalu 2002-imi upernaakkut.

Taakku saniatigut ataatsimiititaliaq marloriarluni Kangerlussuarmi isumaqatigiinnernut 2001-ip upernaavani "Atuarfitsialak" pillugu siunnersuusiornermi peqataavoq.

Tulliuttumi ataatsimiititaliap immikkoortut oqaaseqarfigissavai:

- 1 Inatsisissanik nalilersuisarfik
- 2 Ataatsimiititaliap nalinginnaasumik isummenera
- 3 Paasissutissiisarnerup ingerlaarnera
- 4 Ataatsimiititaliap oqaaseqaatai
  - 4.1 Annertusisamik immikkut ittumik ilinniartitsineq
  - 4.2 Ineqarfiutigalutik atuartunut angerlarsimaffinni inissat
  - 4.3 Sanaartugassat iluarsagassallu
  - 4.4 Akunnerit ilinniartitsiviusussat
  - 4.5 Piffissap atortuulersitsiviusussap kinguartinneqarnera
  - 4.6 Atuartunut angajullernut tapiissuteqartarneq
- 5 Ataatsimiititaliap inassuteqaataa

### **Immikkoortoq 1.0 Inatsisissanik nalilersuisarfik**

Inatsisartut Inatsisissanik nalilersuisarfiata inatsisissamut siunnersuut misissuataarppaa arlalinnillu oqaaseqaateqarfigalugu. Ataatsimiititaliap KIIP-p oqaaseqaatinut taakkununga akissutai pissarsiarisimavai, paasillugulu, Pisortaqarfimmit allannguutissatut inassutigineqartut annertunerpaamik atortuulersinneqarsimasut.

Oqaatigineqassaarli atuartut sinniisaasa aningaasarsianik pissarsisannginnerat ataatsimiititaliap pissusissamisunngitsutut isigigaa. Angajoqqaat sinniisaasa aningaasarsiaqartinnerat ataatsimiititaliap pissusissamisoortutut isigivaa. Soorlu inatsisissamik nalilersuinikkut oqaaseqaatigineqartutut siunnersuummut oqaaseqaatigineqartariaqarput: "*Uppernarsartariaqartoq taamatut assigiinngisitsineq naammaginartunik pissusiviusunillu tunngaveqartunik piumasaaqatitaqartoq imaluunniit assigiinngisitsineq atorunnaarsinneqartariaqartoq*".

Ataatsimiititaliap isumaqatigiittup Naalackersuisut qinnuigissavai, atuartut sinniisaat angajoqqaat sinniisaannut sanilliunneqarsinnaasunngorlugit sulinernullu aningaasarsiaqartilerlugit allannguutissatut siunnersuummik saqqummiusseqqullugit.

Ataatsimiititaliap pingaartutut isigimmagu, atuarfiit siulersuisuini sulinerup pilerinartunngortinneqarnissaa. Meeqqat atuarfiat pitsaasoq, iluarinartoq, angajoqqaat, atuartut ilinniartitsisullu akornanni suleqatigiinnikkut pilersinneqartussa.

### **Immikkoortoq 2.0 Ataatsimiititaliap nalinginnaasumik isummenera**

Inatsisartut Kultureqarnermut Ilinniartitaanermullu Ataatsimiititaliaata Meeqqat atuarfiat pillugu Inatsisartut peqqussutissaattut siunnersuut manna pitsaasutut isigaa. Siunnersuut meeqqat atuar-fiani atuartunut atuartitaanikkut pitsanngortitsinissamik nuannersumik ilimasulersitsivoq, inuiaqatigiinnut avatangiisaasunut sunniisinnaassuseqarluartussaamat. Atuartitaanikkut pitsan-ngortitsineq atuartut

tungaviusumik piginnaasaannik pitsanngortitsinermik annerulersitsisussa  
tamatumalu kingunerisaanik suliffeqarnikkut imminut pilersorsinnaanerunermut  
sunniisinnaassuseqarluartussa.

Meeqqat atuarfianni suliassat pingaarnarpaat ilagaat atuartut eqqarsartaatsikkut  
timikkullu ilisimasaannik piginnaasaannillu ineriartortitsinissaq. Inuiaqatigiit  
silarsuarmi allanngorartuarmi ineriartornerinut aamma kikkut tamat  
oqartussaaqataatillugit eqqarsartaaseqalernissaannut meeqqat atuarfiani atuartut  
paasinnittarnerat siuarsarneqassaaq.

"Meeqqat atuarfiat pillugu Inatsisartut peqqussutissaattut siunnersuutip"  
ilusilersorneqarnerani pingaartinneqarnerpaavoq, meeqqat atuarfiata suliassat  
naammassissagai. Tamakku siuarsarneqarsinnaanerinut periusissat ilagaat,  
atuartitsinermi atuartitsissut klassimiluunniit alloriarfimmi sorlermiinneq  
apeqqutaatinnagit init atuartitsiviusut meeqqat samminerullugit  
aaqqissuunneqarsimassasut. Meeraq qitiutillugu.

Maannakkut meeqqat atuarfiat ukiuni kingullerni annertuumik  
isornartorsiorneqartarpoq ilaatigut atuartitsinerup pitsaassuunnginnera pissutigalugu.  
Meeqqat atuarfiani atuartut naammaginartumik pitsaassusilinnik  
angusaqartarsimannngillat, tamatumalu kingunerisarsimallugu ingerlaqqiffiusunik  
ilinniaqqinnerni ilinniagaqartut ilaasa naammassinissaminnut angusatigut  
ajornartorsiuteqalersarnerat.

Siunnersuutikkut siunniunneqarpoq atuarfik ataqatigiiffiunerusoq atuartunik  
alloriarnernut nukarlernut, alloriarnernut akullernut aamma alloriarnernut  
angajullernut agguataarisoq taamaalillunilu klassit akornanni killiliussaasartut  
akimorlugit ilinniartitsineqartarluni. Tamatumap kingunerissavaa, ullumikkornit  
pitsaanagerusumik atuartup ataatsip pisariaqartitsineranut atuartitsinerup  
naleqqussarneqarnissaanut periarfissaqartoqalernissaa.

Ataatsimiititaliaq ima paasinnippoq. Meeqqat atuarfiat pillugu Inatsisartut  
peqqussutissaattut siunnersuutikkut siusinnerusukku isornartorsiutaasartut  
tusaaniarneqartut aaqqiissutissatullu siunnersuummik pitsaalluinnartumik  
anguniagaqarfiulluartaumillu saqqummiussisoqartoq.

### **Immikkoortoq 3.0 Paasissutissiisarnerup ingerlanneqartarnera**

Siunnersuutip suliarineqaqqaalernerata nalaani ataatsimiititaliaq annertuumik  
akuutinneqarpoq ilisimatinneqartarlunilu isumasioqatigiissitsisarnertigut  
Kultureqarnermut Ilinniartitaanermullu Naalakkersuisumit isumasioqateqarluni  
ataatsimeeqatiginnittarnertigut.

Ataatsimiisitaliap taamatut ammasumik periuseqarneq taamatullu suleqateqarneq  
pitsaalluinnartutut nalilerpaa neriutugalugulu, taamatut suleriaaseqarneq siunissami  
Naalakkersuisuni ilaasortamit qanoq iliorluni suleqateqartarsinnaanerumut  
assersuutissaallualerumaartoq.

## **Immikkoortoq 4.0 Ataatsimiititaliap oqaaseqaatai**

Ataatsimiititaliamit - ilaatigut tusarniaanermi akissutigineqartut aamma siunnersuutip siullermeerneqarnerani oqaatigineqartut tunngavigalugit - ajornartorsiorffiusartut arlallit oqaloqatigiissutigineqartarput minnerunngitsumik uku pillugit:

- Annertusisamik immikkut ittumik ilinniartitsineq
- Ineqarfiutigalutik atuartunut angerlarsimaffinni inissat
- Sanaartugassat iluarsagassallu
- Ikinnerpaamik akunnerit atuartitsiviusussat.
- Piffissap atortuulersitsiviusussap kinguartinneqarnera
- Atuartunut angajullernut tapiissuteqartarneq

Oqaatigineqassaaq, pingaartumik annertusisamik immikkut ittumik ilinniartitsineq aamma ikinnerpaamik akunnerit atuartitsiviusussat suliarineqarnerinut atatillugu ataatsimiititaliamit kommunit KANUKOKA-llu isummerneru annertuumik pingaartinneqarmata.

## **Immikkoortoq 4.1 Annertusisamik immikkut ittumik ilinniartitsineq**

"Meeqqat atuarfiat pillugu peqqutissatut siunnersuummut" nalinginnaasumik oqaaseqaatini allas-simavoq: "*Immikkut ittumik ilinniartitsisarnerup tungaa tamarmi aaqqissuussaannikkut aningaasalersorneqarnikkullu kommuniniitinneqalissasoq*". Naalakkersuisuni ilaasortaq naapertorlugu taamatut aaqqiisoqarnissaa kissaatigineqarpoq, pissusissamisoornerpaatummi isigineqarmat akisussaaffiup, oqartussaanerup aningaasaqarnerullu akornanni ataqatigiittoqarnissaa. Ullumikkut kommunit atuartut immikkut ittumik annertusisamik ilinniartinneqartussat innersuussutigisarpai, aningaasaqarnikkulli akisussaaffik Namminersornerullutik Oqartussaniilluni.

Ataatsimiititaliamit Naalakkersuisunut ilaasortaq isumaqatigineqarpoq oqarami kommunini atuartut ataasiakkaat pisariaqartitaannik kommunit ilisimasaqarnerusut. Aamma suliamik sulia-rinnineq sukkanerullunilu ajornannginnerussaaq, kommunit kisimiillutik atuortoq immikkut ittumik annertusisamik ilinniartinneqartariaqarnerusoq pillugu aalajangiisartuussappata. Siunnersuut naapertorlugu perorsaannikkut psykologimullu tunngasunik siunnersuisarfik (PPR) siunissami taamaallaat kommunit siunnersuinerinnarmik suliaqalertussaavoq.

Ataatsimiititaliamit, aaqqissuussinerup taama ingerlalluartigisup pingaaruteqartigisullu, annertusisamik immikkut ittumik ilinniartitsinerup, allanngortinneqarnissaa pissusissamisoorineqan-ngilaq. Siusinnerusukku annertusisamik immikkut ittumik ilinniartitsineq kommunit akisussaaffigisimavaat, taamatulli aaqqissuussineq allanngortinneqarpoq, tamatumalu kingorna oqartussaanerup Namminersornerullutik Oqartussanut nuunneqarnissaa qinerneqarluni. Maannakkut aaqqissuussineq atorsinnaavoq kommunilu najugarisaq

apeqqutaatinnagu atuartunik assigiiaartumik tapersersuineramik qulakkeerinnittarluni, perorsaanermit psykologiimullu tunngasunik siunnersuisarfiup (PPR) qitiusumik inissisimasup aalajangiisuusarnera pissutigerpiallugu. Taa-maattumik ataatsimiititaliamit tunngavissaqartinneqanngilaq tamatumap allangortinneqarnissaata kaammattuutigineqarnissaa.

Aningaasalersuinissaq eqqarsaatigalugu uparuarneqassaaq kommunimiit kommunimut immikkut ittumik ilinniartitsisoqarnissaanik pisariaqartitsineq assigiinngisitaartorujussuummat. Tamatigullu periarfissaqartoqartarani innarluutilimmik immikkut ittumik atuartinneqarnissaanut innersuussisinnaaneq, taamaattumillu suliasaq tamanna meeqqat atuarfiata isumagisariaqarlugu. Aamma kommuneqarsinnaavoq pisariaqarneratut ikiorsiinissamik neqerooruteqarnissamut aningaasatigut ilinniakkatigullu nukissaqanngitsunik, tassunga ilanngullugit atuartunik immikkut annertusisamik ilinniartitsinissamut eqqarsartaatsikkut ikiorsiineq. Peqqussutissatut siunnersuutikkut isummerfigissassanngortinneqarpoq ataatsimoortumik tapiissutinik agguaaassisarnermi kommunikkaartumik nalimmassaalluni aqqissuussisoqarnissaa. Ataatsimiititaliap pissusissamisoornerungaartutut isigaa maannakkut "aningaasat atuartumut malinnaasarnissaat". Atuartunik annertusisamik immikkut ittumik ilinniartitsinermi kommuni sorlerluunniit allamut nuutto-qarnerani / kommunimulluunniit nuuttoqarnerani kommuni immikkut ittunik aningaasartuuteqartinneqalissanngitsoq, ataatsimiititaliap annertuumik pingaarutilittut isigaa.

Ataatsimiititaliap isumaqatigiittup Naalackersuisut qinnuigissavai, annertusisamik immikkut ittumik ilinniartitsinermi ullummikkutut aqqissuussinerup attatiinnarneqarnissaa pillugu allannguutissatut siunnersuummik saqqummiusseqqullugit.

#### **Immikkoortoq 4.2 Ineqarfiutigalutik atuartunut angerlarsimaffinnik sanaartorneq**

Kingullermik ataatsimiititaliamit KANUKOKA-p ataatsimeeqatigineqarnerani oqaatigineqarpoq, "Atuarfitsialaap" atortuulersinneqarnerani ineqarfiutigalutik atuartunut angerlarsimaffinnik pisariaqartitsineq annertusisussatut naatsorsuutigineqartoq. Tamanna pisariaqartussaavoq, taamatummi alloriarfinnut pingasunut nutaanut avitsilluni aqqissuussinerup kingunerissammagu nunaqarfinni ukiunik pingasunik sivisussusilimmi atuartut angajulliit alloriarfimiittut allanngortitsineq taanna atuartitaanikkut annertunerpaamik pissarsivigisinnaajumallugu illoqarfiliartariaqartalernissaat ilimanarsinnaammat.

Naalackersuisunullu ilaasortamit imaannerneqarpoq manakkorpiaq amerlanerusunik sanaartortoqarnissaanik pisariaqartitsisoqanngitsoq, taamatummi nutaamik aqqissuussinermi klassit ataatsit atorunnaassammata. Ilanngullugu nuna tamakkerlugu meeqqat atuarfiani atuartunut ineqarfiutigalutik atuartunut angerlarsimaffinni inissanik sinneruttoqarmat.

Ineqarfiutigaluni atuarfimmi angerlarsimaffittut init pitsanngorsarneqarsimapput, taamaalillutillu maannakkut pitsaassusissamik piumasarisaasunik eqquutsitsisunngorsimallutik, ineqarfiutigalutik atuartunut angerlarsimaffinni initigut qulaani taaneqartutut taamaanneraaneq KANUKOKA-p ilumuunnginnerarpaa Namminersornerullutik Oqartussanit oqaatigineqartunit ikinnerunerarneqarmata.

Ataatsimiititaliamit pingaartutut isigineqarpoq, "Atuarfitsialaap" aallarnisarneqarnerani pitsaanerpaanik tunngavissiiumalluni pisariaqartinneqartunik aningaasanik immikkoortitsisoqarnissaa. Taamaattumik aamma ataatsimiititaliamit pingaartutut isigineqarpoq, ineqarfiutigalutik atuartunut angerlarsimaffinni inissat pisariaqartinneqartutut amerlassusaasa pigineqarnissaat.

Ataatsimiititaliap isumaqatigiittup ineqarfiutigalutik atuartunut angerlarsimaffiit tungaatigut qanoq killiffeqartoqarnerata misissuiffigineqarnissaa Naalackersuisunut KANUKOKA-mullu qanoq pingaaruteqartiginera uparuaassutigissavaa. Aamma ingerlaavartumik paasitinneqartarnissaq ineqarfiutigalutik atuartunut angerlarsimaffinni inissaqarnerup qanoq ittuunerata maannakkorpiaq sukumiisumik ilisimatitsissutigineqarnissaa, taamaasilluni inissaqassuseq kommunini ataasiakkaani pisariaqartitsinermut piumasaqaatinullu naleqqussarneqassalluni.

### **Immikkoortoq 4.3 Sanaartugassat iluarsagassallu**

Atuarfiit ineqarfiutigalutillu atuartunut angerlarsimaffiit illuutaannut sanaartornissamut iluarsaassisarnissanullu pisussaaffik ullumikkut Namminersornerullutik Oqartussaniippoq, maannakkulli meqqaat atuarfiat pillugu peqqussummi aamma meeqqat atuarfiat pillugu peqqutissatut siunnersuummi siunertaavoq pisussaaffiup kommuninut nuunneqarnissaa. Sanaartornissamut iluarsaassisarnissamullu pisussaaffik annertuumik aningaasartuuteqarfiusussaavoq, pingaartumik kommuninut mikinerusunut tigussallugu ajornartorsiutitaqartussaq. Ajornartorsiut sulilungersunarnerulissaaq illuutit pitsaassusiat ininillu amigaateqarneq kommunimit kommunimut assigiinngitsorujussuummat.

Ataatsimiititaliaq isumaqarpoq, innuttaqassuseq naapertorlugu kommunit aningaasatigut assi-giinnik atugassaqartittariaqartut, taamaasilluni nunatsinni sumiikkaluaraanniluunniit ilinniartitaanikkut illutatigullu pitsaassutsit assigiit neqeroorutigineqartariaqarmata. Taamaattumik ataatsimiititaliap Naalackersuisut kaammattorpai isumaqatiginninniarnikkut taakkua KANUKOKA-mut paaseqatigiissutiginiaqqullugit.

"Atuarfitsialak" iluatsissappat nunatsinni artuarfiit allineqarnissaasa iluarsanneqarnissaasalu "Atuarfitsialammi" siunertarineqartunut aammalu illoqarfinni nunaqarfinnilu pisariaqartitsinermut naapertuuttumik ingerlanneqarnissaat ataatsimiititaliamit pingaartinneqarpoq.

Atuarfiit sanaartugassatigut iluarsagassatigullu pilersaarusiorneqarneri Naalackersuisut qanoq iliorlutik piviusunngortinniarnelugit pilersaarutaat ataatsimiititaliap arlaleriaqaluni ujartortarsimavai.

Ataatsimiititaliaq isumaqarpoq atuarfiit illutaasa avatangiisaasalu pitsaassusaat atuartut ilikkagarusussuseqarnerannut aalajangiisuusumik pingaaruteqartut.

Ataatsimiititaliap isumaqatigiittup Naalackersuisuni ilaasortaq atuarfinnut sanaartugassatigut iluarsagassatigullu pilersaarummik piaartumik saqqummiussaqaqqullugu kaammattussavaa, taamaasilluni atuarfiit illutaat "Atuarfitsialammi" siunertarineqartumut naapertuuttunngortinneqassammata.

#### **Immikkoortoq 4.4 Akunnerit ilinniartitsiviusussat**

Ataatsimiititaliamit paasineqarpoq meeqqat atuarfiat pillugu Inatsisartut peqqussutissaattut siunnersuutaasumi ikinnerpaamik akunnerit ilinniartitsiviusussat qassiunerat klassinut ataatsinut ukiumut nalunaaquttap akunnerinik 30-nik ikilisinneqarsimasut peqqussutissatut siunnersuummut tusarniaassutigineqartumut naleqqiullugu. Siunnersuutaqaartumi siunertaagalarpoq, maannakkut akunnerit ukiunut 11-12-nut agguataakkat, ukiunut qulinut (10) agguataarneqassasut. Peqqussutissap nutaap atuutilerneratigut ukiut atuarfiusussat ikilisinneqaraluartut, atuartut nalunaaquttap akunnerinik atuarfissaminnik annaasaqassanngillat.

Peqqussutissatut siunnersuummut matumunnga oqaaseqaatini oqaatigineqarpoq taamannak akunnernik ikilitsisineq pissasoq aaqquissuussinerup atortuulersinneqarneranut atatillugu aningaasartuuteqarnerussutissat ikilisinneqarnissaat siunertaralugu.

Siunnersuummut oqaaseqaatini oqaatigineqarpoq: "*Kommunit maannakkutut akunnernik amerla-nerusunik neqerooruteqartarsinnaasut*". Ataatsimiititaliap pissusissamisoortutut isiginngilaa, nalunaaquttap akunneri ima ikilitigissasut, naatsorsuutigineqartariaqalissalluni kommunit nalu-naaquttap akunnerinik amerlanerusunik tunniussisariaqalernissaat. Ataatsimiititaliamit naatsorsuutigineqarpoq akunnernik ikinnerpaaffigisassatut amerlassusilinnik illersorneqarsinnaasunik ajornartorsiutitaqanngitsumik neqeroorutigineqarsinnaasunik aalajangersaasoqarsimassasoq.

Ataatsimiititaliaq isumaqatigiittoq isumaqarpoq, aallaavittut pilersinniakkamut aningaasanik sa-pinggisamik iluatsitsiffiunerpaatitsinissamut pisariaqartinneqartunik aningaasaliisoqartariaqartoq.

Naalackersuisunit oqaatigineqarpoq alloriarfiusumik atuartitsisarnermi ilinniartitsisussaqaarniarnermilu "Atuarfitsialammi" siunertarineqartut, vikarinik atuneq aamma nalunaaquttap akunnerinik atuanngitsoortitsisarnerit annertuumik ikilisinneqarsimanissaat.

Ikinnerpaamik akunnerit ilinniartitsiviusussat naak ikilisinneqaraluartut, ataatsimiititaliamit neriuutigineqarpoq, nalunaaquttap akunneri atorneqavissut ullumikkutut amerlatigiinnarumaartut.

Siunnersuummut oqaaseqaatini oqaatigineqarpoq sapaatip akunnerani ataatsimi 1. klassimiit 7. klassimut alloriarfiusuni ilinniagassatigut suli minutsinik 45-inik annikkillisitseqqittoqassasoq. Tamannali ataatsimiititaliap akuersaarsinnaanngilaa. Matumani pineqarput atuartut ullumikkut peqqussutaasup nalaani atuarnerminnik aallartitsisimasut, taakku atualernerminniit ukiumik a-taatsimik siusinnerusukkut ukioq atuarfitsik naammassisussaavaat. Aammattaaq ilinniartitsisut atuartitsinerup nutaamik aaqqissuunneqarneranut ikaarsaariartinneqartussaanerat eqqarsaatigisariaqarmat.

Piffissami ikaarsaariarfiusumi atuartut ikinnerpaamik akunnerit atuarfigisassaasa ikiliseqqinneqannginnissaat pillugu ataatsimiititaliap isumaqatigiittup Naalackersuisut qinnuigissavai allannguutissatut siunnersuummik saqqummiusseqqullugit.

#### **Immikkoortoq 4.5 Piffissap atortuulersitsiviusussap kinguartinneqarnera**

Naalackersuisut allannguutissatut siunnersuummik, 2002-mi augustimi atuuttuulerfissap 2003-mut augustimut kinguartinneqarneranik kinguneqartumik, saqqummiussaqqarput.

Ataatsimiititaliap naammagisimaarlugu maluginiarpaa peqqussutissatut siunnersuutip atortuulersinneqarnissaanut piffissaliussaq ukiumik ataatsimik august 2003-mut kinguartinneqartoq. Tamanna peqqussutissap iluatsitsiviunissaanut, tassalu aallaqqaataaniilli naalackersuinikkut ingerlatsisuniit soorluttaa pisortanit, ilinniartitsisunit, atuartunit aamma angajoqqaanit sapinngisamik siamasinnerpaamik tapersorneqarnissaa pingaarluinnarpoq, taamalu atortuulersitsineq aatsaat pissasoq, taamaasiornissamut naatsorsuutigisat pingaaruteqarnerpaat eqquutsinneqarpata.

Ataatsimiititaliamuttaaq pitsaasuvoq allannguutissatut siunnersuummi atuarfiit piareersimasut maannakkut peqqussummi atuuttumi aalajangersakkat sanioqqunnissaannut akuersissummik piniarnissaannut aalajangersakkamik ilanngussisoqarnissaa, peqqussutissatullu nutaatut atuutilersussatut naatsorsuutigisag malillugu ilinniartitsineq aallartillugu.

Ataatsimiititaliap isumaqatigiittup atortuulersitsinissamik piffissap august 2003-imut kinguartinneqarnissaa taperserpaa. Ilanngullugu ataatsimiititaliap isumaqatigiittup, atuarfiit piareersimasut august 2002-miit peqqussut nutaq malillugu ilinniartitsinermik aallartitsinnaanerap taperserpaa.

#### **Immikkoortoq 4.6 Atuartunut angajullernut tapiissuteqartarnej**

Naalackersuisut allannguutissatut siunnersuummik, atuartunut angajullernut tapiissutaasartut attatiinnarneqarnissaannik kinguneqartumik, saqqummiussipput.



Ataatsimiititaliap isumaqatigiittup atuartut anginerit tapiissuteqarfigineqartarnissaat pillugu allannguutissatut siunnersuut Naalakkersuisunit saqqummiunneqartoq taperserpa.

### **Immikkoortoq 5.0 Ataatsimiititaliap inassuteqaataa**

Ataatsimiititaliap isumaqatigiittup, ataatsimiititaliap qulaani taaneqartutut kaammattuutigisaannut naapertuuttumik Naalakkersuisut allannguutissatut siunnersuutinik saqqummiussippata, siunnersuut tamanna tunngavigalugu akuersissutigineqassasoq, inassutigaa.

Kultureqarnermut Ilinniartitaanermullu Ataatsimiititaliaq taama oqaaseqarluni "Meeqqat atuarfiat pillugu Inatsisartut peqqussutissaattut siunnersuut" pingajussaaniigassannngortippaa.

Naimingitsoq Petersen,  
Siulittaasoq

Ruth Heilmann

Lars Karl Jensen

Olga Poulsen

Mogens Kleist